



Broj: 05-4373-5/19

Sarajevo, 26. 12. 2019. godine

Na osnovu člana 23. stav (1) tačka d) Zakona o Agenciji za bankarstvo Federacije BiH („Službene novine FBiH“, broj 75/17), člana 16. stav 1) tačka j) Statuta Agencije za bankarstvo FBiH („Službene novine FBiH“, broj 3/18), člana 70. Zakona o javnim nabavkama („Službeni glasnik BiH“ broj 39/14, u nastavku: Zakon), člana 10. stav (1) Pravilnika o postupku dodjele ugovora o uslugama iz Aneksa II. dio B Zakona („Službeni glasnik BiH“, broj: 66/16), a na osnovu preporuke komisije iz Zapisnika o pregledu i ocjeni ponuda u postupku nabavke usluga, broj: 05-4373-3-1/19 od 24. 12. 2019. godine, direktor Agencije za bankarstvo Federacije BiH donosi

ODLUKU **o poništenju postupka javne nabavke usluga**

Član 1.

Poništava se postupak javne nabavke usluga sistematskog zdravstvenog pregleda radnika Agencije za bankarstvo Federacije BiH u Sarajevu (u nastavku: ugovorni organ), s obzirom da nijedna od primljenih ponuda nije prihvatljiva.

Član 2.

Ponude ponuđača: „PZU Poliklinika „Atrijum“ i PZU Poliklinika „Agram“ Sarajevo, odbijaju se kao neprihvatljive.

Član 3.

Ova odluka objavit će se na internetskoj stranici Ugovornog organa www.fba.ba, istovremeno s upućivanjem iste ponuđačima koji su sudjelovali u postupku javne nabavke, u skladu s odredbom člana 70. stav (6) Zakona o javnim nabavkama.

Član 4.

Ovom odlukom stavlja se van snage Odluka o izboru najpovoljnijeg ponuđača u postupku nabavke usluga, broj: 05-4373-4/19 od 12. 12. 2019. godine.

Član 5.

Ova odluka stupa na snagu danom donošenja i dostavlja se svim ponuđačima koji su sudjelovali u postupku javne nabavke, saglasno članu 71. stav (2) Zakona o javnim nabavkama.

O B R A Z L O Ž E N J E

Postupak javne nabavke predmetnih usluga pokrenut je Odlukom o pokretanju postupka javne nabavke usluga, broj: 05-4373/19 od 20. 11. 2019. godine.

Javna nabavka je sprovedena u skladu sa Pravilnikom o postupku dodjele ugovora o uslugama iz Aneksa II. dio B Zakona o javnim nabavkama. U skladu s odredbom člana 7. stav (3) Pravilnika o postupku dodjele ugovora o uslugama iz Aneksa II. dio B Zakona o javnim nabavkama, Ugovorni organ je pripremio i objavio Poziv za dostavu ponuda na svojoj internetskoj stranici, dana 21. 11. 2019. godine, a izmjenu Poziva za dostavu ponuda, dana 04. 12. 2019. godine, uz istovremeno upućivanje istog na adrese trojice potencijalnih ponuđača.

Procijenjena vrijednost nabavke utvrđena je u iznosu od 58.000,00 KM – bez poreza na dodanu vrijednost (PDV).

U skladu s odlukom ugovornog organa imenovana je Komisija za javne nabavke (u nastavku: komisija), kojom su definisane njene nadležnosti, koje uključuju poslove otvaranja, pregleda i ocjene ponuda, te davanje preporuke za odabir najpovoljnijeg ponuđača. Slijedom navedenog, komisija je u okviru svojih nadležnosti i ovlaštenja provela predmetni postupak nabavke, te o tome sačinila Zapisnik o zaprimanju ponuda u kojem je konstatovano da su po predmetnom postupku nabavke pravovremeno pristigle 2 (dvije) ponude, od strane slijedećih ponuđača: PZU Poliklinika „Agram“ Sarajevo i PZU Poliklinika „Atrijum“ Sarajevo.

Na osnovu izvršene analize i ocjene prispjelih ponuda u pogledu kvalifikacijskih i cjenovnih uslova nadmetanja tj. u pogledu zadanih uslova i zahtjeva iz Poziva za dostavu ponuda, komisija je utvrdila da ponude navedenih ponuđača ispunjavaju sve uslove i zahtjeve iz Poziva za dostavu ponuda, te da su iste prihvatljive za ugovorni organ. Saglasno članu 64. stav (1) tačke b) Zakona, u skladu sa zadanim kriterijem najniže cijene tehnički zadovoljavajuće ponude, komisija je dala preporuku direktoru ugovornog organa da donese odluku o izboru najpovoljnijeg ponuđača, te je na osnovu preporuke donesena Odluka o izboru najpovoljnijeg ponuđača u postupku nabavke usluga, broj: 05-4373-4/19 od 12. 12. 2019. godine (u nastavku: Odluka o izboru).

Dana, 23.12. 2019. godine, u propisanom roku, ponuđač u postupku PZU Poliklinika „Agram“ Sarajevo, izjavio je žalbu na Odluku o izboru. Razmatrajući po žalbi ovog ponuđača, u skladu s članovima 97. i 100. Zakona utvrđeno da je ista blagovremena, dopuštena i izjavljena od strane ovlaštene osobe, čime su ispunjene procesne pretpostavke za razmatranje iste. Shodno odredbi člana 100. stav (3) Zakona, utvrđeno je da je žalba ponuđača PZU Poliklinika „Agram“ Sarajevo u cijelosti osnovana, te je odlučeno da se postojeća Odluka o izboru stavi van snage.

Komisija je ponovno pristupila pregledu i ocjeni pristiglih ponuda u skladu s utvrđenom procedurom, saglasno članu 65. Zakona, te na osnovu izvršene analize istih u pogledu ispunjavanja zadanih uslova i zahtjeva iz Poziva za dostavu ponuda, te evidentirala nepravilnosti u ponudama ponuđača PZU Poliklinika „Agram“ Sarajevo i PZU Poliklinika „Atrijum“ Sarajevo kako slijedi:

- Ponuđač PZU Poliklinika „Atrijum“ Sarajevo, nije izvršio numerisanje i parafiranje svih stranica u ponudi, a što je u suprotnosti s poglavljem IV. tačka b - način izrade ponude Poziva, u kojoj je navedeno da je ponuđač dužan stranice ponude označiti brojem, na način da je vidljiv redni broj stranice, te da svi listovi ponude, osim neizmijenjene odštampane literature, trebaju biti parafirani i potpisani od strane ovlaštenog lica;

Navedeni ponuđač nije ispunio uslove navedene u poglavlju III. (Uslovi za kvalifikaciju ponuđača), tačka 4.(Tehnička i profesionalna sponosnost – član 50. Zakona), s obzirom da je isti dostavio potvrdu o uredno izvršenom ugovoru koju je sačinila druga ugovorna strana, iz koje nije vidljiva vrijednost obavljenih usluga u posljednjoj poslovnoj 2018. godini, obzirom da je period izvršenja ugovora od 01.04.2017.godine – 01.04.2019. godine, tako da iz dostavljene dokumentacije nije moguće utvrditi vrijednost ugovora u posljednjoj 2018. godini, odnosno da li je iznos izvršenih usluga u istoj, najmanje jednak vrijednosti nabavke.

Nadalje, navedeni ponuđač izostavio je dostaviti potvrde za otvoreni devizni račun kod UniCredit Bank d.d. Sarajevo i Sparkasse Bank d.d. Sarajevo, koji se nalaze na dostavljenom Izvještaju o računima koji izdaje Centralna Banka BiH, a što je u suprotnosti s uslovom iz Poziva, u kojem je navedeno da je ponuđač dužan dostaviti kopiju potvrde izdane od strane poslovne banke gdje je račun otvoren, kojom će dokazati da račun nije blokiran u zadnjih 12 (dvanaest) mjeseci, računajući od dana objave Poziva za dostavu ponuda na web stranici Agencije, za svaki od računa koji bude naveden u Izvještaju o računima koji izdaje Centralna banka BH.



Na osnovu navedenog, komisija je konstatovala da navedeni ponuđač, nije dokazao da njegovi računi kod ovih banaka nisu bili blokirani u zadnjih 12 mjeseci od datuma objave Poziva za dostavu ponuda, čime nije ispunio u cijelosti sve zadane uslove navedene u poglavlju III. (Uslovi za kvalifikaciju ponuđača), tačka 3. (Ekonomska i finansijska sposobnost – član 47. Zakona).

- Ponuđač PZU Poliklinika „Agram“ Sarajevo nije ispunio minimalne uslove za kvalifikaciju navedene u poglavlju III. (Uslovi za kvalifikaciju ponuđača), tačka 3. (Ekonomska i finansijska sposobnost – član 47. Zakona), iz razloga što je isti dostavio potvrde izdane od strane Ziraat Bank BH d.d. i UniCredit Bank d.d., u kojima je navedeno da račun ovog privrednog subjekta nije bio blokirani u zadnjih 12 (dvanaest) mjeseci od 02.12.2019. godine, odnosno od 03.12.2019. godine (datuma izdavanja potvrde), što nije usklađeno sa zadanim uslovom iz Poziva, kojim je traženo da potvrda mora biti izdana od banke sa navodima da račun ponuđača nije bio blokirani u zadnjih 12 (dvanaest) mjeseci u periodu od datuma objave Poziva za dostavu ponuda na web stranici Agencije (21.11.2019.godine).

Kod navedenog ponuđača, u dostavljenoj potvrdi od strane Addiko Bank d.d. Sarajevo je navedeno da račun ovog privrednog subjekta nije bio blokirani unazad 12 (dvanaest) mjeseci od 29. 11. 2019. godine (datuma izdavanja potvrde), što nije usklađeno sa zadanim uslovom iz Poziva, kojim je traženo da potvrda mora biti izdana od banke sa navodima da račun ponuđača nije bio blokirani u zadnjih 12 (dvanaest) mjeseci u periodu od datuma objave Poziva za dostavu ponuda na web stranici Agencije (21.11.2019.godine).

Na osnovu navedenog, komisija je konstatovala da navedeni ponuđač, nije dokazao da njegovi računi kod ovih banaka nisu bili blokirani u zadnjih 12 mjeseci od datuma objave Poziva za dostavu ponuda, čime nije ispunio u cijelosti sve zadane uslove iz tačke 1.3. TD – Ekonomska i finansijska sposobnost ponuđača, odnosno člana 47. Zakona.

Nadalje, navedeni ponuđač izostavio je dostaviti potvrde za otvoreni devizni račun i podračun kod UniCredit Bank d.d. Sarajevo, te za otvoreni podračun kod Ziraat Bank d.d. Sarajevo, koji se nalaze na dostavljenom Izvještaju o računima koji izdaje Centralna banka BiH, a što je u suprotnosti s uslovom iz Poziva, u kojem je navedeno da je ponuđač dužan dostaviti kopiju potvrde izdane od strane poslovne banke gdje je račun otvoren, kojom će dokazati da račun nije blokirani u zadnjih 12 (dvanaest) mjeseci, računajući od dana objave Poziva za dostavu ponuda na web stranici Agencije, za svaki od računa koji bude naveden u Izvještaju o računima koji izdaje Centralna banka BH.

Slijedom navedenog, komisija je jednoglasno predložila da se obje prispjele ponude odbiju, u skladu s članom 68. stavovima (1) i (4) tačkom i) Zakona, te dala preporuku da se predmetni postupak poništi, u skladu s članom 69. stavom (2) tačkom d) Zakona, s obzirom da nijedna od primljenih ponuda nije prihvatljiva za ugovorni organ, što je evidentirano u Zapisniku o pregledu i ocjeni ponuda, broj i datum iz uvodnog dijela ove odluke.

Uvažavajući sve navedeno, odlučeno je kao u dispozitivu.

POUKA O PRAVNOM LIJEKU:

Protiv ove odluke može se izjaviti žalba Ugovornom organu – Agenciji za bankarstvo Federacije BiH, najkasnije u roku od 10 (deset) dana od dana prijema ove odluke, saglasno članu 97. i 101. Zakona. Žalba se izjavljuje Uredu za razmatranje žalbi/Kancelariji za razmatranje žalbi – Filijala/Podružnica Mostar, putem Ugovornog organa, u pisanoj formi, direktno ili preporučenom poštanskom pošiljkom. Žalba se podnosi u najmanje 3 (tri) primjerka.

Dostaviti:

- svim učesnicima u postupku
- a.a.



Zmaja od Bosne 47b,
71000 Sarajevo,
Bosna i Hercegovina



T ++ 387 (33) 72 14 00
F ++ 387 (33) 66 88 11



E agencija@fba.ba
W www.fba.ba

